

重修兩淮鹽法志

兩淮鹽法卷八十八

督銷門

淮北督銷

四

正陽卡局

下

光緒五年正月鹽政沈葆楨示照得正陽之南大王廟向有訟棍租賃僧舍作為豫販公所借修廟為名希圖斂費每鹽一包私取錢六文且聚集無業游民遇事生風藉端興訟大壞鹺政見經本部堂飭派督銷局委員將公所立予革除一面會縣查拏斂費主訟之人從嚴究辦以清弊源而安商業合亟出示嚴禁為此示仰商販

人等知悉自示之後不准再設豫販會館公所等名目
希圖歛錢興訟儻敢復萌故智一經察出定即從嚴究
辦決不姑寬其各懍遵

光緒五年正月鹽政沈葆楨批正陽督銷局直隸州廖綸
詳所稟售鹽公所係因局屋窄逼是以另設一處去總
局不過數武仍由該員前往查察是與淮南鹽歸局售
無異出鹽過稱均係掣籤尤為得法無須再發淮南章
程轉多周折矣近來到關之鹽來源太猛不無擱壓該
直牧深恐積鹽太多弊端復起所慮極是惟販戶之衰
旺全視鹽利之厚薄有利則來無利則去今正陽整頓

一新各販聞風踊躍不論何省之人皆准販運出湖能
禁豫販票販之獨占便宜不能禁豫販票販之一體裝
運欲求不疾不徐之法祇要西壩與正陽隨時通氣乙
亥新綱開售後應由該員體察岸情何月約運多運少
先期知會海分司該分司接文後或可暫停壩稱或須
趁水趕運復加斟酌曉諭各販遵辦便不致過於積壓
至自運名目仍應永遠革除以清積弊但使事事一律
販戶行戶無從畸輕畸重卽銷滯不至懸殊候札運司
海分司遵照

光緒五年六月正陽督銷局直隸州廖綸稟本屆乙亥綱

前到之鹽不特下色居多上色竟不到十分之一甚有
泥沙黑色以及花雜不堪者買販每見醜鹽往往退縮
坐守上色以致銷數未能大旺出輪未能迅速擬請自
丙子綱爲始凡湖販到壩均擇好鹽分上中下三等勻
配購運俟抵關後如查有全運下色毫無上等以及泥
沙黑色花雜之鹽概行提出罰停十輪俟罰滿挨輪時
每包僅准售價二兩零四分惟鹽色核實該湖販等又
必專搶上色購買難免不暗中貼費漸虧商本日復一
日大局仍壞並另派安人到壩密查如有私向票販貼
色者加罰十倍如此嚴行定章諒各湖販自知儆惕則

下綱到關之鹽色較有把握其銷數亦可冀起色矣經
鹽政沈葆楨批整頓鹽色業已三令五申天時如此湊
泊人事必背而馳之自官而商而販皆甘於自棄如此
奈之何哉據議下綱到關之鹽查有全運下色罰停十
輪俟滿罰挨輪時每包僅准售二兩四分准如所議辦
理至貼色本非湖販所樂咎有攸歸沿流溯源總自場
商之居奇始而場商之敢於居奇總自分司之瞻徇始
過關盡是下色則上色盡以售私毫無疑義仰准運司
將海分司摘去頂戴如下綱仍無起色卽詳請奏參並
通行遵照

光緒五年六月正陽督銷局直隸州廖綸稟鹽船定章無論何項差使一概不准封拏去歲奉憲臺嚴行示禁各處雖稍知斂迹而日久玩生近來上下鹽船復被索擾封拏故態復萌上年春間因船少運滯尙派員加價分投招雇今當商情踊躍正北鹺起色之時設因中途封擾退縮不前將來復爲整治又非易事擬令湖豫兩販各造白粉條板二寬約五寸長約四尺一寫兩江督鹽部堂示無論何項差使不准封雇一寫淮北督銷總局某販名第幾號官鹽船字樣分釘本船兩旁如海上商船之式並由卑局加給印花令其刊刻板上以昭憑信

而示區別凡經過沿途地方驗有前項粉板印花隨即放行不得封雇裝差亦不得留難需索果能中途無阻實於北漕大有裨益經鹽政沈葆楨批准如所稟在於各船兩旁釘用粉板刊刻印花以昭憑信而示區別仰候通行各州縣並咨河南撫部院轉飭汝光等屬約束差役無論何項差事概不准藉端索擾俾利鹽運該局仍將編列字號販名開冊送查

光緒六年五月正陽督銷局道員湯壽銘稟據豫販方大興等具稟求免掣籤及請改公行定價章程等情伏思公行定價之章於公事既屬整齊於販情亦無滯礙該

豫販等所請更改之處係屬偏私之見應不准行惟掣籤一章該販等既始終以爲不便應請暫將籤筒撤去此後豫辦各販來公所買鹽仍須挨次掛號驗資再由公所委員督同買賣兩販照估樣定價交易不准兩販私相授受不准行戶高下其手如此試辦數月若無流弊卽爲定章若有流弊再當隨時稟辦經署鹽政吳元炳批據稟正陽售鹽設立籤筒豫販躉販既始終以爲不便該道擬將籤筒暫行撤去此後預辦各販仍須掛號驗資照估樣定價交易是於變通之中於成法尙無關礙准其試辦卽督飭委員認真稽察勿任暗增暗

跌致啟弊端並候札飭淮運司海分司知照

光緒七年三月正陽督銷局道員湯壽銘稟丁丑綱新鹽開運旋值河水淺涸難行自去冬十一月至本年二月初旬正陽雖出輪七次計鹽祇十萬餘包核其鹽色上中下三等配搭尙勻二月望後河漲鹽艘羣集自二月下旬至三月中旬接開八九十三輪亦鹽十萬餘包上等僅千餘中等三萬餘下等六萬餘下等之下下色又居其半凡此三輪初開中等及下等之下上下中等鹽皆兩日售罄惟餘下下一色滯而不動前輪未了後販又來恐誤銷場不能不接續開輪計卡上下守輪候查

船鹽尙二十六七萬包特飭各販自開實數清單又皆上色少而下色多並據各販面稱西壩續後開除鹽色更遜於此若全數到關後出十餘輪稍好之鹽必已埽數提盡買販攜多貲而索高貨賣販求設法而售低鹽交易各不得所公私因而兩困其弊一旦下鹽質輕雜有硝槍涵耗倍甚船戶守候日久私盜客鹽爭鬪訟獄由此蜂起其弊二定章守輪鹽各分段停泊以杜抵套弊混鹽價由局板定不准私自漲跌不准搭用貨物毛錢一經下鹽擁滯各章皆將紊亂其弊三爲今之計本綱鹽色業無挽回所望下綱鹽色認真整頓提前趕

運來關酌與下鹽配銷或是維持敗局之一策再稟北卡查出販船有挖補倉單包引等數字樣業經職道行知海分司調查十二堡卡倉單存根核對惟恐此等情弊時復不免仍飭認真查驗目前出輪滯銷下鹽三萬餘包河下守輪在船者十數萬包西壩續運出湖者尙不知若干職道擬先令本販於上游運路稍熟者換船自作豫販運銷或押回關下壽州懷遠各口岸分銷免其重完鹽釐若再不能通暢則於同是下鹽中分別質之輕重色之青白酌量略減鹽價三者交盡儻下鹽乃滯則非俟下綱上鹽到關搭銷別無設法經鹽政劉坤

一批北鹽向來粒大色潔最合豫皖銷路自禁貼色後
場商不顧大局屢以醜鹽掙交丁丑綱鹽開辦之始據
該分司稟明鹽價改歸庫發每引先給三錢鹽運到堰
由局委評驗鹽色如上中戶各稱其名下戶亦均乾潔
無泥沙硝鎗者再給價銀二錢其餘一錢遵照沈前部
堂批定章程鹽到西壩驗色後再行找發又開綱時每
局選派結實可靠委員一人會同局員駐堰驗色如上
中戶有好鹽不交而以次色掙交者立予改撥等語層
層鈐束定章不爲不嚴今丁丑到關之鹽下色已多如
果西壩續後開除鹽色更遜於此實於銷市大有窒礙

張運判夙稱明幹情形亦極熟習何竟一任敗壞至此
上年所派駐堰驗色各委員試問所司何事尙得謂之
結實可靠耶局委場員局商相率欺朦均屬咎無可諉
場商如掇交次鹽至三次者定章應將該商名下垣產
充公仰候札飭運司確查分別輕重詳候嚴懲以昭炯
戒目前戊寅新鹽正在開捆之際應責成該分司督飭
各票販多捆好鹽趕速挽運到關俾與前綱下色酌配
勻銷以資補救儻再任以醜鹽應捆定惟該分司是問
另單所稟疏通下色三策目前舍此別無良法該道務
卽竭力妥籌勿任久滯挖補艙單究係是何弊端查明

後並卽據實稟覆

光緒七年五月正陽督銷局道員湯壽銘稟奉憲臺批挖補艙單究係是何弊竇卽查明後據實稟復等因昨據海分司稟轉據十二堡卡委員高人佺查覆挖補艙單各戶竇因正月以前洪湖水小各販減載增船以免淺擱二月以後湖水日長各販又併載騰船以省水腳先領艙單數目不符到卡呈請挖改該委一時冒昧許其挖改艙單所改包數實與大票截角之數相符其中並無弊竇等語業將該知事稟請運司記大過一次以示懲戒並由該分司另發新式艙單多刻數目小戳將

包字連於數目之上使中無餘地以防弊端各等情理
合據實稟覆至正陽三四月來疏銷下下色鹽經職道
勸諭買販凡買中等及下等之下上色鹽者各均配銷
下鹽已銷去五萬餘包查上年每綱正陽不過銷下鹽
十二三萬包今兩月已銷五萬餘包銷數不爲不多無
如旋銷旋積前後牽算至十二輪止仍遞存下鹽將及
三萬包此後惟當多方設法勿任久滯經鹽政劉坤一
批據稟正陽前存下下色鹽三四兩月已銷去五萬餘
包具徵該道疏銷得力戊寅新鹽前已札飭海分司督
飭票販多捆好鹽趕運俾與前綱配銷以資補救以後

當無下鹽運關該道仍當隨時竭力妥籌勿任久滯將
來新鹽到關鹽色若何仰仍隨時稟報

光緒七年七月正陽督銷局道員湯壽銘稟竊奉憲札據
湖販武雙盛等稟懇整輪板價以期關壩一律並乞裁
減浮費等情當經批示運關鹽色果符所定之等該局
於輪章何肯通融該販等以所買上中之鹽賣上中之
價鹽色果符上中耶若欲以中下之鹽售上中之價水
販豈肯聽受如謂上輪未清不應再開下輪但贖下低
鹽水販不願承買停稱十天半月有督銷之責者將坐
視其壅積莫展一籌耶湯道於下鹽壅滯之後一面稟

請整頓一面勸諭水販據報三四兩月已銷去下鹽五萬餘包不得謂無裨於湖販夫鹽色之壞雖由票販場商之朦混亦由該販等貪圖賤價賒欠並不認真選剔以致抵關之鹽率多低醜照章應罰停十輪湯道未嘗深究已屬格外從寬乃獨不自悟反歸咎於辦理者之未協實出情理之外惟輪章稍事活動諒出必不得已一俟新鹽抵關仍應嚴整輪規以保售價而順販情至稱售鹽公所徒存虛名或恐不免當此接准部文刪裁浮費之際此項應否撤裁候札湯道分別遵辦議覆等因職道伏查淮北湖販人類至雜人心亦至不齊但知

苟且目前競趨小利輒持其一偏之見仰望於辦公者從而袒之一不當意遂至流言本年下鹽壅滯職道前稟分別其鹽色青白鹽質輕重酌與減價至今並未照辦誠以法至此無以復加且恐涉紛更轉多枝節是以留而有待續後豫販三次來局具稟謂湖販貪圖賤價賒欠多購下色強渠等銷售請爲減價亦未批准其時湖販亦有一稟則請將下下之鹽提八下中惟泥沙黑色之鹽斯歸下下又謂下鹽太多由於估樣時少估上鹽中鹽之故經職道反復批駁計無復之乃創爲關壩鹽價不一律之說而其在壩捆運時多以臨青下戶屬

雜太中上中戶致鹽色參差不能一律之隱情則不肖明以告人凡此議論皆正陽先有所聞而不能曲徇者也至此次上稟所稱輪章活動整輪板價之章皆失等語則正陽未之前聞夫前輪之所以不清由於下鹽滯而不動後輪之不能不開藉以好鹽銷下色計五六兩月又搭去下下鹽四萬餘包此皆各販目睹其情而身受其利且有天良不昧向公所委員言而生感者稟中乃以此爲辭豈非言不由衷自相矛盾又稟中辨論丁丑綱鹽色不佳等語頗似西壩票販之言不解何以出自湖販之口卽其開呈由壩運關每鹽一包價費釐金

款目亦與正陽疊飭各販自開款口不符正陽所開每包至多不過二兩一錢四五分而該販等開呈每包二兩二錢六七分實屬浮冒欺罔惟有恪守定章而行以力統籌全局而持其平雖暫時不能盡如人意事經久遠必有獲其益而知其是者至各販稟裁售鹽公所一節查售鹽公所本由各販稟設今已十年初議湖販每鹽一包抽取公所經費銀三釐繼又因各販意見不同每包祇抽銀一釐五毫則由公行行用中提取從前該公所經費均歸兩淮候補鹽經歷王琳董理浪費侵蝕每年積有虧短今遵憲批議復擬請卽將售鹽公所裁

撤湖販實捐之經費銀每包一釐五毫亦卽停止以免藉口應辦公事併入稟設之督銷公所辦理惟督銷公所經費向係取給於售鹽公所且正陽四處義塾及年終恤孤等款行之已久勢難驟停應請將行用中提取之一釐五毫仍舊歸督銷公所經費經鹽政劉坤一批既據議將售鹽公所裁撤所有向歸湖販捐繳之每包一釐五毫應卽停止其向歸行用中提取之一釐五毫仍應照舊徵收以作義塾恤孤等項之用每年年終將收支各數開摺報查以昭核實至下色之鹽又經搭售四萬餘包以後次鹽當可漸少新鹽到後務遵前批將

輪規照常嚴整每值一輪可將配搭次鹽若干先期榜示前輪未清不准再開後輪以杜藉口

光緒七年十二月正陽督銷局道員湯壽銘稟竊職道前奉憲批新鹽到關宜查明截至何日止實存下色鹽若干包酌分幾輪搭銷大張告示俾每輪搭銷下色若干豫販湖販了然於胸必須前輪銷訖再開後輪等因伏查職局辦定章程出輪時於局門挂有輪榜估樣後於公所挂有榜樣註明某湖販某日上卡鹽若干包估列某等某色某日豫販來公所買鹽卽按日於榜樣後黏貼條示亦註明某豫販買某湖販某等某色鹽若干包

下鹽壅滯時並註明搭銷下色若干必俟前販之鹽銷訖公所於榜樣販名下加蓋銷訖紅戳始准後販接銷似此每輪銷鹽存鹽之數目某販應銷不應銷之次序已能一目了然至前輪銷訖再開後輪向來皆遵照辦理惟夏秋之交因前輪下鹽壅滯不能不接開後輪搭銷而後輪下鹽又多前者搭銷未清後者壅滯更甚是以前後套搭總不能輪清一輪好在刻下陳綱下鹽業經設法疏銷一律罄淨戊寅新綱鹽亦接開二輪計十萬餘包鹽色較好遂能仍復按輪銷訖舊規統計本年銷數似較上年有盈無絀是則從前籌銷下鹽時意想

之所不及儻此後接續出輪鹽色不遜則不獨輪章可
期整肅銷市亦必日有起色容再隨時稟請憲示祇遵
經鹽政劉坤一批陳綱下鹽業經設法銷罄深以爲慰
戊寅綱鹽色較好尤宜嚴整輪規前輪銷訖再開後輪
案如山立一定而不可易仰卽堅守妥爲經理

光緒八年三月鹽政左宗棠札照得本爵閣部堂見經批
准加足淮北原額票鹽十六萬三千十八引應卽設法
疏銷以重商本查正陽關向定輪銷原爲保護大商起
見然有小販自船運鹽一二百包者亦歸輪銷章程每
至守候一年半年之久與大販相持未免太苦應飭淮

運司會同淮北督銷局湯道察看如何稍示變通凡自船祇運二百包以內准其原船過卡完釐後運至各口岸自行售銷不必在正陽憑行交易庶小販易覓銷路而豫販到正陽仍有大商之鹽可買總期於商情稱便於鹽務有益

光緒八年四月署運司徐文達淮北督銷道員湯壽銘稟奉札見經批准加足淮北原額票鹽十六萬三千十八引飭令酌議章程等因遵於三月間傳集各湖販傳諭憲飭事理令其各言所便其運鹽數千包之大販曰所貴乎輪章者爲其整齊畫一各販乃有憑藉今若准自

船鹽運二百包者完釐上駛則人人可改運二百包之
船大販亦化爲小販竊慮輪章不散而自散未見其便
其運鹽千包及數百包之中販曰販等亦由小販營運
而來頗知小販苦况就見在正陽輪期而論至遠者不
過半年尙有微利可沾今若准二百包之船上駛初次
獲利必厚販等不難踵而行之第恐人同此心則上游
之擁擠搶跌又不如是閒守輪之較有把握其運鹽一
二百包之小販等不願守輪者半赴壽州下蔡懷遠沫
河口等處銷售其來正陽守輪者則亦自有計算今准
二百包之船上駛誠是販等之便但公事爲重總求斟酌

酌行之此販情之大概也各販又言以守輪耗費而論則大販實倍於小販大販雇船載鹽水腳銀每包自一錢七分至一錢八九分或二錢不等小販自船無之以二百包核算已省銀三四十兩船小人少足敷守輪食用之需加以自船修理完固鹽包滷耗無多自船人手親密不虞盜賣若合小販本利計之轉似贏於大販此利數之大概也復查陳卷正陽輪章屢有變更或准豫販自往西壩運鹽至正陽者原船上駛或准湖販運鹽四十包之小販原船上駛均以流弊滋多旋准旋禁至桂守中行督銷淮北時因行戶講張太甚輪章不能核

實於是稟准散輪任販所往當時販情始則歡聲雷動
繼則偃偃無之曾不數月羣詣憲轅稟求仍復輪章自
此以後湖販守輪之心堅矣今以販言利弊所及核之
向章因革之由似輪銷一有變通深虞掣動全局不如
飭令職局所屬之沫河口壽州下蔡懷遠四處分卡嗣
後祇准二百包之鹽船駛入內河覓售多者概歸正陽
輪銷該四卡每年約銷鹽三十萬包再合之五河上下
可以就地灑賣之處亦每年銷鹽三十餘萬包小販銷
路不爲不廣經鹽政左宗棠批既據集販公議僉以守
輪爲宜其運二百包以內之小販擬儘內河覓售均尙

近理應准照辦

光緒十年七月正陽督銷局道員黃立鰲稟職道莅辦以來適際淮北連年荒歉輪鹽滯銷去歲盜賣之案層見疊出甚至數百包不等職道飭委員友隨帶外卡摺手按月抽查出其不意販船尙知畏戒數月以來尙無盜賣之案沫河距正陽五里由此運往潁屬各食岸小戶貧販資本無多裝運數十包及一二百包運銷營生歷年約十萬包之譜去歲因有流弊銷至十七萬餘包今年新正販船擁濟由沫卡過釐駛入劉家集洄流集新集等處希圖繞越俾正陽輪鹽不銷經張道停止過釐

內江縣志卷八
概不准進雖豫販陸續來關而衛私亦因此侵入職道
訪察情形再三籌度計每歲銷數當以十一二萬爲度
少則衛私鄰逼侵灌多則奸販改票舞弊當飭該卡委
員查明分戶大販押赴正陽守輪并飭各小販鹽船到
卡務先報明運往某處售銷聽候擡查批票過釐仍由
職局每月分別旺次按旬放行飭派礮船押送梭巡不
准搬壩越輪移行潁州府屬地方文武汛官一體示禁
併出示禁私在案壽州分卡銷數盈絀均有關礙盈則
侵入六安霍山一帶售與觔販有礙正陽輪銷絀則南
運北鹽由合肥一帶侵灌正陽食岸有防銷路釐亦減

色近有鹽船過釐後駛入該州之船廠埠董家埠由三覺寺搬運馬頭集等處銷售邀截解販繞越輪章查壽卡歷年銷數約七八萬包之譜九年來已銷至十萬包有餘今歲春夏鹽船更多運往已飭壽卡委員仿照沫河辦法每歲以十萬包爲度以清其源至於懷遠分卡以下之長淮衛十里城下蔡分卡以上之魯家溝六安以下之馬頭集私設各行棧勾引車驢解划水陸繞越走漏鹽釐均經派委會同地方官查辦閉歇在案然整頓雖稍有頭緒而銷數仍欠暢旺細按其由一因衛私侵占一因淮鹽色低不能抵敵如河南之汝甯七屬上

蔡西平遂平確山四縣盡食衛私新蔡汝陽正陽三縣均爲衛私侵灌汝河以上一遇水發尙可行船雖閒有淮鹽運往不甚銷行全賴上色之鹽方可敵私其食淮鹽之地僅存信陽羅山光州光山商城固始息縣七屬販戶來關裝運專揀上鹽惟安徽六安霍山一帶簞販尙銷次鹽其餘英山霍邱亦需中等奈近日各販裝運到關下鹽過多中鹽亦少上鹽無幾推求其故湖販多係本小力微貪圖賤價賒欠到關恃有輪章終必配搭銷脫豫販觀望徘徊不敢販運恐不銷行有虧成本以致衛私深入日形疲滯庚辰綱到棧之鹽尙有七十餘

萬包其中好醜交錯堆積如山實難剔選昨第十一次提出二成一萬三千餘包均係下鹽豫販不肯售受再三退換僅得上鹽五十包中鹽一千包下鹽一萬二千餘包此次因各販在西壩裝運未知諭飭暫從寬免如該販嗣後再運下鹽自當照章罰輪減價以示儆戒經鹽政曾國荃批鹽色爲疏銷最要關鍵上屆庚辰綱雖已銷至綱尾而次色過多以致銷數阻滯本屆新綱宜引爲前車之鑒目前辦鹽正在捆運出場仰候札飭海分司督飭印委痛除積習多選上色以資補苴至新蔡等縣衛私任意侵灌實爲淮銷之害并候咨請河南撫

部院轉飭一體嚴禁

光緒十年十二月湖販勳慶長等三十二戶公稟淮北鹽務自兵燹後疲廢更甚蒙曾文正公按票湖豫三販成本之多寡評定利息之厚薄以昭平允遂定票販賣價每石不得過銀八錢湖販賣價上色不得下銀二兩八錢下色亦不得下二兩七錢豫販賣價聽其自主起落嗣因水淹鹽池場商藉竈戶之苦每引加銀一錢票販藉修金山寺捐銀一萬兩爲名賣價漸長至一兩一錢以外蒙曾文正公復莅兩江察知原委出示曉諭以票湖兩販相依有如唇齒票販利厚則湖販利薄必致裹

足以壞大局雖場價增銀一錢而攤之一引四包每包
僅二分零何致每包長銀三四錢之多復定每包上色
鹽不得過銀一兩以外下色不過九錢兼憐湖販有洪
湖長淮之險應防虧折更有保價宜板不宜活之示又
因長淮兩岸多屬瘠壤遂分三段而立票湖豫
名目使干數百里長淮節節各得生業以杜得隴望蜀
之漸立法至公至善聞有三十年不能更改之奏各販
咸遵行之有效曾文正公薨逝未久而票販又藉捐小
邏堡銀三十萬兩爲名鹽價復長至一兩一錢以外每
每下色亦與上色同價嗣經湖販訪知乃係票販爲請

永不驗資專歸原票販久遠長業此銀本不應與湖販相干竟轉增於鹽價迄今十餘載核算不下百餘萬兩彼實名利兼收而湖販陰受其害似應請仍遵曾文正公曉諭鹽價上色不許過銀一兩以外之示且大可慮者輪章或聚或散聚則輪長積滯盜賣難堪散則瓦解冰消莫可收拾卽如光緒三四年間各販風散正陽幾致一空西壩鹽如山積票販避課潛逃釐金因之不保是明徵也謹將公議各條繕摺開呈 一公議如票販豫販兩販均遵曾文正公釐定舊章鹽價銀平鹽稱悉照舊章畫歸曹砧一律儻果湖販比票豫兩販利多卽

請督鹽憲核准酌提湖販多出之利以敵汝甯四屬之私一公議汝甯三四縣私鹽侵灌必須籌出常久銀款以便賤價持久茲擬不用場商票販豫販攤款止求恩准飭知票豫兩販遵照曾文正公定章鹽價銀平鹽稱悉仍歸舊貫情願由所合計款內聽憑督鹽憲核准酌量提銀先儘敵私下有餘款再歸補恤湖販之不足一公議敵私疏銷莫如賤價約計每石貼銀六錢即可敷敵似應按每年每縣約定二萬包四縣合計八萬包共合貼銀四萬八千兩復按湖販正陽每年可銷八千萬包按每包提銀六分合八十萬包將提合四萬

八千兩之數以備津貼之用 一公議如欲復廢引則
票豫兩販鹽價銀平鹽稱均宜悉遵舊制則賤價敵私
之款可以永遠裕如不欲復廢引則票販鹽價可復舊
章湖販售與豫販鹽價祇能照後來二兩四錢八分以
下九等堅守卽不能復二兩七八錢之價販等不能爲
一己之私恐致稍傷大局似應飭知票豫兩販鹽稱銀
平均畫歸曹砧一律以昭公允 一公議衛私之巧卽
巧在不完釐金縱汝屬聽其私銷似宜商請河南撫憲
在於入汝要隘設立鹽卡每石完釐或一千或五百文
此釐仍歸河南撫憲協餉公用則彼之成本加重自不

能深入矣。一公議見聞各處封船半因海防行軍半因漕糧北上皆係要差湖販毫無把握船戶膽怯思逃兼聞票販仍有公商長價之說則湖販之利將盡難免裹足之思更不得不請給護照既可保免封雇又可防其改途實整頓淮北鹽政之一大關鍵也。經鹽政曾國荃批查核公議稟摺販意重在鹽價鹽稱銀平三項良由近年獲利較微不無心存希冀情亦可原惟久經定章一經改動窒礙甚多至疏銷之法首重暢岸保固藩籬不使鄰私深入卽邊界不能行鹽無礙大局凡兩省交界鄰鹽本輕運速斷非路遠價昂之官引所能敵汝

甯之上蔡西平遂平確山等屬灘險路遙廢棄已久卽如光緒六七年閒北鹺暢行並非復汝之力前署海分司徐運判力思復汝減價減釐幾致潰敗決裂可爲前車之鑒伍泰來等一稟已批候咨請河南撫部院將東關所設三義衛鹽店飭令押閉但須豫販趕運淮鹽接濟民食方免藉口此外各條惟抽收衛釐似尙可採但收釐後一經下侵勢難緝拏亦屬弊多利少餘均無裨時局不必輕議紛更也

光緒十二年四月鹽政曾國荃批准北票販鴻慶等稟湖販阻銷難副奏限一案查湖販向來不論何省何商皆

可承運文正公奏案刊章從無票販不准兼充湖販之說該票販等以奏銷在卽銷市疲滯招來新販轉運出湖期副奏限足徵力願銷路屏除畛域之見乃湖販一再妄稟以致販情觀望奏限不能如期迹涉把持情實可惡轉瞬開辦癸未新綱尤宜廣招新販買運出湖其票販中力能兼充湖販更於銷路有裨豈容他人攔阻票湖兩販誠如所稟唇齒相依一經攻訐未有能獨享其利者嗣後湖販儻再膠執已見架詞妄控定卽提轅究懲以爲阻撓鹽務者戒

光緒十六年十一月正陽督銷局道員劉鍾靈申准北正

陽爲眾販總匯之區自前鹽政曾文正公派委設卡擇要於正陽之北設一總卡凡淮北票鹽由洪澤湖運至正陽者經北卡撻查上卡是爲湖販到正抽釐之所並恩准先售二成完釐以紓商力其餘八成設立輪章板定鹽價鹽稱挨次售銷又於正陽之南設一驗卡凡岸販來關按鹽色之上下定價值之高低毫無起跌岸販經過南卡撻查照出以杜夾私之弊是爲督銷岸販出卡之所南北兩卡爲正陽樞紐互相稽核此正陽設卡之大概情形也復於壽州懷遠沫河下蔡等處各設一分卡皆就皖北境地支河入淮扼要而設凡小販裝鹽

數十包及一二百包者不能來關守輪准其裝運各分
卡攔查完釐駛入各食岸銷售復因壽州卡有支河可
以繞越又於石頭埠設一分卡懷遠卡有支河可以繞
越又於新城口設一分卡沫河卡有支河可以繞越又
於魯家口設一驗卡下蔡卡有支河可以繞越又於泥
河口設一驗卡所以防沿途灑賣及偷漏等弊此分設
各卡之大概情形也汝甯廢岸久被蘆私侵占逐漸侵
銷暢岸今鹽政威毅伯曾檄飭前辦徐文達會同三省
大員勘定引界先在新蔡之洪汝河口設局緝私並撥
恪靖水師前營礮船四號駐劄巡緝攔堵水道俾淮鹽

由大洪河口運入汝河行銷是爲關鎖第一層門戶復由職局收取湖販每包一分項下招募緝私馬步隊勇分駐東西洪橋及廟灣寺耳埠等處攔堵旱道是爲關鎖第二層門戶卽就正陽湖販所捐塘工每包一分津貼湖販運鹽濟汝由緝私局掣驗分撥聽販自售平價敵私近年以來銷數漸暢成效顯然此整理汝岸之大概情形也再六安馬頭集一帶專銷下色之鹽向係來關購運正陽先售二成完釐之鹽下色居多歷年積滯解餉不能如期推原其故多由盤越不得力求整頓以冀疏銷因於六安州設立驗卡並派巡緝礮船禁止

盤越是以六安餉販赴關購運者源源而來每月計銷一萬數千包之多釐餉既不至遲延下鹽亦毫無壓積歟販稱便此六安州設立驗卡之大概情形也

兩淮鹽法志卷八十八

兩淮鹽法志卷八十九

督銷門

徐淮食岸

徐郡毗連山左銅山五邑舊爲東鹽引岸惟邳州宿遷
睢甯例食淮鹽地瘠岸疲引懸無薄同治閒司鹺政者
銳意經營議以官運倡導遂合淮安之桃源號曰四岸
光緒九年始有商人認運鹽政曾國荃百計調護始則
減釐輕本繼則讓價售鹽甚至票販津貼循環搭欠四
岸乃獲僅存蓋補苴罅漏若斯之難也志徐淮食岸

同治五年二月運司丁日昌稟徐州府所屬宿遷睢甯二

縣邳州一州共行一萬一千九百七十引兵燹之後以鹽抵課徐臺借運北鹽行銷豐沛蕭碭銅山五縣向歸東引之岸以抵解款新章恐其流弊一概停止而北鹽本有應銷之徐屬邳宿睢三州縣引地未經議及似不能置額引於不顧徒爲私鹽之所侵占自應仍復舊制以符定例本司見在清理淮北池面爲正本清源之計查臨興場之臨浦局鹽色較次駁費甚重商旣無力收埽販又艱於認運產不足額考核攸關亟須廣籌銷路以補販運之不足歷來淮安徐州兩府所屬行銷北引不論鹽之色粒山陽清河離西壩甚近大票准其改岸

山清另加戳記惟桃源宿遷睢甯三縣及邳州一州均
係毗連引地若謂有礙山東引鹽則私鹽透漏不特無
益於東且有害於北如以徐州設卡每包收捐尙可稍
濟軍需何如將北鹽引課酌提若干成以歸徐臺解款
惟不得越境行銷以示區別而固藩籬至如何明定章
程本司遠駐揚城該處情形究未深悉應請札飭淮揚
徐海兩道督同府縣迅速妥議稟覆署鹽政李鴻章批
查淮安府屬之山清桃徐州府屬之邳宿睢皆爲淮北
食鹽口岸在二十九萬餘引綱額之內所收引課奏定
作十成分攤載明刊章不能酌提以歸徐臺解款惟見

在販鹽大率出湖行銷而桃源宿遷睢甯三縣及邳州一州各岸久不銷鹽自宜設法整頓以廣銷路據議運銷臨浦次鹽事屬可行至應酌濟徐臺若干如何飭販領運如何派員督銷應由該司督同海分司妥議章程稟候核定再飭遵照

同治五年二月海分司沈炳稟徐州府屬之宿遷睢甯二縣邳州一州共額行北鹽一萬一千九百七十引淮安府屬除清河等縣外桃源一縣額行北鹽九百七十引以上四州縣共額行北鹽一萬二千九百四十引久爲私鹽侵灌幾同廢岸見蒙憲臺設法整頓專運次鹽係

爲額引起見卑職察看情形非收買場鹽不足以清其源非杜絕私路不足以遏其流非疏通河道不足以利轉輸非減輕成本不足以保正課非官爲倡導不足以招販運非會同地方不足以資彈壓謹議六條呈候核轉示遵嗣後辦有起色仍由販運至出局過卡一切均照票鹽章程辦理以歸畫一 一請收垣鹽以舒商力也查臨浦場垣久未收鹽竈丁率多刁生劣監以透私爲熟路今欲鹽歸垣收非官以輔之不能化其獷悍擬請由海分司庫酌借銀數千兩會同委員場官督收酌加垣租核定鹽價運壩分銷以利轉輸 一請嚴緝私

以衛官鹽也查臨浦私鹽大半由海州西門薔薇河行走每於潮水漲時連檣而至盡屬積慣私梟帶有器械動輒聚眾拒捕擬請酌派廉幹武弁令帶壯勇礮船八隻常川梭巡 一請禁挖壩以利挽運也查臨浦河道久經淤塞上年已將海河壩堵閉挑通淤沙見又委員續辦工竣之後臨浦鹽路應可通行惟查當地居民往往私挖壩工實有害於鹽運擬請憲示嚴禁將每年築壩銀兩由海分司於經費項下撙節開支 一請刪經費以輕成本也查臨浦鹽色較次運道稍遠上年開辦庚申新綱迄今請運寥寥擬請准將每引經費四錢免

繳如果試行有利再行酌量徵收 一請先倡導以廣招徠也查桃宿邳睢各食岸商販久未行銷淮鹽人地生疏殊多畏阻擬請遴委委員先行倡導其應繳正雜課銀一兩二錢一分五釐應請准其緩納以一千引爲率暫於經費項下墊付俟前鹽銷至五百引即將課銀歸還再行續運 一請定考核以暢銷路也查鹽法銷鹽地方定有考核以售鹽之多寡定地方之功過擬將每月銷數申報憲轅及移海州分司查考並詳明督鹽憲札行徐揚兩道轉飭各州縣文武遵照再查徐臺本有鹽卡收私鹽捐釐一款係爲軍需而設若不停止抽

釐則官鹽混雜有礙銷路然一經免釐而徐餉不無稍
紕查食岸卽在綱額之內業已十成分撥既不能於正
課酌解官鹽經費擬請刪除以輕成本又不能按包捐
釐惟有徐淮銷鹽一引呈繳徐臺軍需若干應請核定
數日月終彙解俟軍務告竣卽行停止其地方文武緝
私彈壓亦有公用於何處銷鹽卽於何處酌提以資辦
公至姚灣地屬徐境毗連東邑是否設卡以杜侵灌屆
時應由委員稟請核辦經運司丁日昌轉詳署鹽政李
鴻章批據陳桃宿邳睢幾同廢岸且擬專運次鹽自須
略予變通方足以廣招徠見將所議章程詳加酌核第

一條擬借淮北經費官收場鹽係因商力不足輔以官
本事屬可行惟委員最難其人須揀廉慎可靠者仍責
成分司督率經理究須借銀若干兩卽行核算稟覆第
四條臨浦鹽色較次運道又遠據請每引免繳外辦經
費四錢以輕成本未始不可惟淮北票鹽隨地可以灑
賣食鹽科則與綱鹽稍有輕重恐奸販藉端影射卽以
食鹽出湖流弊無窮應如何立以限制嚴加稽查之處
尤宜慎之於始應再飭該分司詳議覆核第五條經費
旣已減免又請緩納正課未免太優況課項有關軍需
仍應照章於場鹽到壩後完繳第六條州縣事繁不能

責令銷鹽地方考核久成具文無濟於事似不若另派
食岸督銷委員與分司互查引票非但於疏銷有益且
可杜越界影射之弊至銷鹽一引應貼徐臺軍需若干
應提公用若干須由該分司細核成本議定覆核第二
條嚴緝場私第三條嚴禁挖壩皆係應辦之事俟章程
核定卽由該分司分別派弁出示可也

同治五年六月署運司程桓生詳竊奉憲批前司轉稟遵
飭議覆臨浦次鹽行銷徐淮等食岸章程一案當經轉
飭海分司遵照妥議詳覆核辦去後茲據該分司詳稱
遵查督鹽憲批借領經費官收場鹽一條擬請先行酌

借經費銀八千兩以爲收鹽之本應請由憲臺揀委廉
慎可靠之員專辦官收事務卑職仍督率經理惟臨浦
局竈丁向係著名刁劣儻敢留難阻撓隨時稟請嚴辦
又免繳經費恐致影射一條擬請於此項運徐之鹽自
場運壩仍由局卡截角至壩運徐由卑職在大票蓋印
註明徐淮食鹽不准過湖字樣即使奸販透漏出湖上
游必須驗票再由卑職移會正陽督銷局一體嚴定倍
罰章程以免藉端影射又緩納正課未免太優一條凡
票鹽到壩得有賣價方能完課運徐食鹽旣不在壩出
售卽不能在壩完課况官收官運本屬借支經費其一

切運腳尙須籌墊若令在壩先完亦惟有再由經費支撥但官運暫爲倡導究須藉以招徠當此商情畏阻卽有資本亦運太平中富而不運臨浦運西壩正陽而不運徐岸此次以徐淮久廢之食岸爲臨浦次鹽之出路以化私爲官之意應請轉詳俯准前稟暫行緩納以到徐兩箇月收繳課銀前運完清再請後運設造報屆期先以經費暫行墊解隨後歸補於課項亦無短絀又州縣考核久成具文不如派員督銷一條當此試行之初銷數若干未敢豫必另派委員督銷未免多糜經費擬請遴委官運一員整頓銷數尤爲核實惟是各岸久慣

行私驟易官運難保無當地土棍串通私販種種把持壟斷非鹽務委員力所能制仰祈轉詳通飭食岸各州縣文武協同彈壓巡緝庶私販咸知警畏至應貼徐臺軍需一節見在每引水腳成本較重徐淮賣價未定若干擬請先行酌定每銷一引繳徐臺軍需一錢歸入成本之內其公用之項應俟委員到岸後將如何整理銷數賣價有無餘利再行酌核應提公用若干屆時稟報惟官私混淆勢難並立見繳徐臺軍需一錢則徐臺所收鹽釐亟應詳請飭停以杜私販侵占署司伏查該分司議覆各條均尙妥洽似應俯如所請辦理經署鹽政

李鴻章批檢閱該分司議覆各條尙稱周妥運徐大票擬由該分司加印註明徐淮食岸不准過湖字樣尤足杜影射之弊悉如所議辦理仰候通飭食岸各州縣文武協同彈壓巡緝並札徐臺停止收釐以疏官引而遏私源至請派官收官運委員務揀廉慎可靠之員前往仍責成該分司督率妥辦將收運數目按旬開摺報查同治五年十一月鹽政李鴻章札照得徐淮之桃宿邳睢各食岸見由該分司稟辦官運該四邑自軍興以後官引久不到岸民間食私歷有年所本署部堂訪聞邳州之華陽地方與贛榆之青口毗連沭陽之湯家溝地方

與海州之響水口毗連該兩處均有著明私梟開設鹽槽私相買賣小民習以爲常車載驢馱接踵前往幾不知鹽有官私之別此時旣行官鹽自宜設法嚴禁但操之太急貧民生計頓絕亦易滋生事端見在宿遷地方已據程署運使派委運判陶守怡設局督銷可將平日販鹽之人招之使來曉以利害責令就近赴局繳價領鹽承充水販不准再往鹽槽買運但使有利可圖該鹽販等自必樂從豈必甘心犯法洵屬化私爲官善策台特札飭卽便轉移督銷陶運判遵照

同治六年四月署運司程桓生詳據海分司沈運判稟稱

奉徐州道札開前因議行官運將徐淮鹽釐裁撤後有奸商猾販每每借官票以夾帶私鹽以致官鹽不行且諸般影射滋弊日多似此無益官運有礙兵餉亟應設法嚴禁以杜私梟嗣後無票私鹽仍須照舊收捐除飭碭灣釐局委員朱令卽日添設分卡稽收無票私鹽釐金並出示曉諭外合並行知一體出示曉諭等因伏查徐臺此次捐收鹽釐因無益官運有礙兵餉係爲目擊時艱不分畛域整飭釐務起見惟額引本例定之案抽釐乃外辦之事今宿邳一帶聞私梟照章捐釐釐輕於課無不樂從此後官鹽更無銷路應如何辦理之處伏

乞核示俾有遵守並據另單稟稱邳宿桃三州縣北岸
爲私鹽囤積之所南岸爲私鹽銷售之地睢甯一縣居
宿邳之中係屬旱道並無水路惟有桃境三義壩起至
邳境黃林莊止沿河一帶分設局卡上下聯絡官鹽由
局發賣私鹽由卡堵遏自北至南卽難飛渡日則嚴加
巡守夜則將渡口船隻統歸南岸卽有軍務各差可隨
渡隨回儻有私渡情弊立予嚴辦其南路來販鹽者無
私可買自必赴局領售北岸縱有私鹽銷非其地謀利
較難亦必化私爲官所慮開辦之初經費無出可否仰
祈詳明督鹽憲就近咨商漕河憲札委熟悉情形廉幹

文武員弁將成字河兵勇酌撥二百名分派局卡又馬
隊五十名常川梭巡會同卑職辦理岸務以壯聲勢一
切器械火藥口糧無庸另行置備祇須局用尙易籌墊
並諭素有名望公正各董分任其事無任私梟滋生事
端如能辦有成效核給優獎藉資鼓勵所售鹽勛應繳
課稅以一半爲清淮防堵之用一半爲徐臺接濟之需
另給官票分岸行銷惟不准過湖以杜影射而免漏釐
謹將分設局卡開摺呈核各等情並呈清摺伏候裁奪
署司當查徐淮食岸試行官運案內議以每銷一引繳
徐臺軍需一錢停止收釐以杜私販侵占詳奉批准咨

行遵照但鹽釐不停恐私梟益肆官引仍不能銷署司
前在徐州業與該道面商以試行一年爲期如無成效
再行另籌辦理目前應遵批定章程仍飭各釐卡一律
嚴禁私鹽如有無票私鹽到卡卽將人鹽并獲照例懲
辦業經備文移覆今據該運判稟局委朱令見已添設
分卡出示收捐自係署司覆文尙未接到惟是徐臺抽
捐本與定案不符若開此端私販益無忌憚目下徐淮
食鹽引地已爲侵占將來豫皖各岸後路亦可繞越殊
非保全釐課力固藩籬之道且恐舊制難期漸復而徐
臺向設幾卡每包若干觔完釐若干是否加倍議罰作

正開支之處均未奉有明文見在淮北按綱造報非從前積壓可比額引攸關卽食鹽各岸試行官運雖未能確有把握而次第整頓亦可收得尺得寸之效該運判所擬售出鹽筋應繳課稅以一半爲清淮防費之用一半爲徐臺接濟之需洵與餉需有裨經署鹽政李鴻章批查山東私鹽侵銷徐淮軍興後厯由徐州糧臺抽釐放行係因淮北食鹽久未到岸不能不變通辦理今北漕已照舊開綱邳宿睢桃四食岸經海分司力圖整頓籌辦官運欲復引地須先清引界欲暢官銷須先絕私源係一定辦法若徐淮各卡仍舊抽釐放私則引界混

淆官私莫辨官運卽無從著手況每銷官鹽一引已議在成本內津貼徐餉一錢見在徐州善後局與糧臺已合併爲一不似從前之支絀不應任鄰省無票之鹽占本省應收之課仰候札飭徐海道照案停止以顧大局而保藩籬至兵勇緝私祇可令其扼要屯駐藉壯聲威遇有大夥私梟協同兜拏若令其分管局卡必滋事端且得錢賣放緝私之人卽係作弊之人仰另行妥議詳奪至官運所收課稅應如所擬卽以一半撥歸清淮徐臺仰卽轉飭海分司知照

光緒九年七月五河卡知府黎福保通判冒沅稟據泗靈

虹岸商鄧應舉等稟以淮北全綱鹽務由湖販運買出湖以正陽爲銷路大宗次則長淮州縣食鹽爲最去歲奏請加引因銷市疲滯檄飭皖軍馬步各防營分駐泗靈等處緝私冀銷正引緣泗靈蒙淮等州縣與江蘇之睢宿桃邳爲毗連接壤該處食岸近銷之鹽久非正額係由官運餘鹽成本每觔僅十一文岸價僅售十四五文道路旣近價又便宜淮北十餘州縣之食戶宜其購食餘鹽趨之若鶩自皖軍駐緝私販斂迹泗靈等處向無官銷去春飭紳招徠籌集股本領認泗虹靈三處口岸會稟督鹽憲批飭試辦雙溝設局報釐潼河驗票於

去歲八月卽由壩歸檔捆運迄今先後擇要開張試辦
因爲四岸餘鹽侵灌不獨泗靈銷市疲極卽蒙淮鳳潁
等處之正引均爲滯銷均爲賤價餘鹽所苦商等泗靈
之岸賠累已極刻聞憲局力祛餘鹽積弊以顧長淮大
局稟請撤餘鹽歸正額由檔捆運同於湖販一律旣不
限額又將四岸向完稅銀分解漕徐協餉之項與礮船
經費均由另款籌撥皆與岸商無干釐政從此一新正
引銷路必日漸起色僅以無商承辦誤此一簣未成之
功致將全淮藩籬未能完固商等邀集股友公同籌商
情願認此桃宿睢邳四岸旣無須新舊票販讓引與湖

販同一赴場捆運亦與商等運泗靈之鹽一律辦理惟岸價自須按照成本之貴賤酌定低昂一切礮船等費與岸商自不干涉查徐臺岸壩所存餘鹽尙有十二三萬之多擬請酌留岸存以三萬包爲則多去少補定以成額向來官運成本抵岸入倉共扯每觔十一文之譜仍照該岸先鹽後課舊章隨同旬報解繳海分司此項三萬餘鹽每包情願加稅銀一錢釐金擬請減半抽收以示體恤隨同鹽價分別解繳俟此存鹽銷清由西壩同於湖販歸檔捆運等情旣據該岸商情願認領四岸不須票販讓引與湖販一律向票販買鹽由壩捆運赴

四岸行銷是卽改歸正引加足稅課卽與該商前所認之泗靈虹岸及各湖販均歸正額辦理又情願於楊莊加收釐金是淮北所運皆正引之鹽而價值均歸一律無畸輕畸重之弊既可免賤價之繞越侵灌又可以暢正引之銷於淮北大局實有裨益仰懇俯准該商認領四岸承辦並懇不拘以引額試行一二年後以銷之多寡再定額數其所呈章程六則一四岸銷路視守運河之防緝爲旺滯一督銷委員仍宜熟手一鹽稱鹽色宜稟定章程俾商民有所遵守一新舊商交盤宜請委員督交一新舊商接辦皆宜設法體恤一開設分銷子店

仍請照舊在邳州之本社嵯灣宿遷之本城睢甯之高
作桃源之本城共五處經鹽政左宗棠批查邳宿睢桃
四食岸侵銷日盛一日該守等目擊其弊業據招有新
商鄧應舉等不須票販讓引情願加足稅課加半釐捆
運壩鹽提價出售自係爲力保藩籬起見所擬章程六
條尙無取巧之處應准照辦候札海分司先將四岸餘
鹽截止捆運以便新商接辦惟從前侵銷之故由於餘
鹽本輕且未定額是以漫無稽考今雖成本加重而票
鹽完全釐食岸鹽完半釐較正引猶覺便宜難保無奸
販仍前影射出湖必須立以限制庶免眾販藉口查志

載邳宿睢桃四食岸共額行北鹽一萬二千九百四十引應先就額試辦一年如銷不足數不令包完課釐以示體恤如溢出額數則仍難免無侵灌之虞應覆加妥議再辦一面另擬大票釐票敘明越境卽以私論字樣刊印飭發

光緒九年七月鹽政左宗棠批五河卡知府黎福保等請於楊莊雙金閘盱眙等處設卡抽釐驗票一稟查淮北四食岸業據該守等招有新商稟認批准照辦據請將舊縣分卡移設盱眙縣城抽收半釐並擬於楊莊設卡稽查雙金閘設卡驗票戴參將礮船經費由新舊販分

攤漕徐協餉以半釐協解不敷由五河釐金項下撥補均如所請辦理仰候札飭陳令彤輔遵照移設並准由該局稟請運司揀派委員兩名分往楊莊雙金閘經理創辦伊始以嚴禁需索爲第一要義並飭海分司盱眙縣查照至湖販正引奏明五河以下不收鹽釐因該處路近價賤所以紓販力而暢銷路也否則前人豈不知增釐卽以增餉哉其侵銷泗靈由於黃擺渡分卡稽查不嚴抽收不實所致以後應飭該卡認真整頓力除偷漏若加收半釐非但於奏案不符且計算成本半釐較全釐爲輕若輩得以釐票爲護身符應防影射侵銷於

釐務致有妨礙不得謂漏卮盡塞也應毋庸議

光緒九年七月鹽政左宗棠札行運司暨海分司據黎守福保呈遞條陳內稱淮北銷市之暢滯全在緝私之得力正陽宜嚴緝衛私路私五河則專在淮私經章鎮統領水陸各軍專守運河布置堵緝極爲得力惟四岸地跨運河之南北向銷餘鹽成本既輕夾私尤鉅侵灌正引銷路莫此爲甚雖准改歸正引而四岸若不改絃更張仍屬有名無實縱有章鎮緝私之得力亦不能稽查四岸之行正引與否四岸之鹽須渡運後方行銷各處擬請於楊莊設立分卡雙金閘設驗票卡專稽四岸之

夾私酌量加收半釐以示體恤至各湖販運鹽赴五河
正陽一帶亦難保不夾帶私鹽未到五河以前卽於盱
眙縣灑賣亦爲正引之害應將舊縣分卡移駐盱眙縣
城以扼其要盱眙桃宿邳睢均在五河以下從前暫不
收釐以紓販力見在規復舊額四岸在額引之內焉有
引復而地方尙不應復之理至海分司以漕徐協餉礮
船經費無著爲詞查從前四岸每引祇繳漕徐協餉一
兩二錢八分一釐四季由錢糧局按新舊票販花名攤
成完納每年共繳庫平銀二萬五千六百二十兩而四
岸所獲之利每年除礮船經費萬串外盡歸商夥及各

陋規與一切開銷每年約在三萬餘串而票販徒占去自己正引銷路並無絲毫利益又賠此協餉故新舊票販稟請改歸正引不願再辦若另招商認並無滯窒難行之處不惟正引暢銷淮北大局實有裨益卽新舊票販亦得脫此重累於裕餉恤商洵爲兩全等情查此案業經本爵部堂於該守另稟分晰批示合行札飭運司海分司遵批辦理

光緒九年九月署海分司徐紹垣稟據票販鴻慶等稟稱四岸巡緝礮船販等前辦四岸時勅設經費一款卽由四岸措給今將岸務退出若再另籌礮船經費販力實

有不逮等情伏查該販等所稟尙屬實情嗣後四岸礮船日支經費可否如黎守原稟在五河分設楊莊釐卡所收鹽釐項下提撥以示體恤乞示遵行經鹽政左宗棠批查釐金係報部正款未便擅支礮船經費以後四岸承買壩鹽免致侵銷正引於票販實有裨益惟全飭販繳既據稟稱力有未逮姑准酌減一半卽在淮北經費項下開支以恤販情而全公事

光緒十年三月鹽政左宗棠批五河鹽釐卡稟查邳宿睢桃四食岸自改運壩鹽增完鹽釐自宜酌加售價且各局售價高下向由鹽局稟候鹽政覈定何以海分司此

次議由地方官覈辦致阻商情殊不可解茲該守等擬定每觔售二十三文則較前次提至二十四五文更形減輕居民無可藉口應卽照此定案

光緒十年五月徐州道段喆稟新商鄧應舉等面稱認領桃宿睢邳四岸以來折耗幾及二萬金求請准予退歇等情伏查四岸改運正鹽加價出售原爲力固淮北門戶而設乃試行未久淮北之滯銷如故新商之虧本難支重以餉絀來源民嗟貴食揆諸恤商裕

國便民三者悉皆深受其累計每歲虧短漕徐之協餉增支緝私之勇糧折耗新商之資本一出一入何止十萬

職道身居局外何敢越俎代謀祇以徐防餉需有關未便匿不以聞經鹽政曾國荃批察核稟詞該道於諮訪情形頗覺周詳漕轅防營餉需不能源源接解尤爲本爵部堂之所厯念亟須設法以圖持久惟於餘鹽正鹽之利害該道未悉其中底蘊甚謂短餉何止十萬則言之過矣此外亦有未盡確實者卽就壩銷而論昨據運司稟報近日西壩浹旬之間能銷十餘萬包此由正陽銷路疏通推及西壩與該道面詢海分司情形已復不同至正鹽西壩售價每包得一兩二分正課經費俱在其內又如楊莊增抽半釐成本之重在此餘鹽每包祇

徵稅銀一錢此外全免影射之弊在此認商固難免虧折而謂已及兩萬金未足盡信漕徐固屬短餉而通查解項漕轅已解至上年年底徐防已解至本年二月並非通年不解防守運河之勇糧係爲保守全綱而設不能專指四岸該道殆可恍然總之該四岸刻下斷無再運餘鹽之理然鹽價增昂係屬實情從前尙冀該道到徐後勸諭紳民遵諭買食今核來稟情形貧黎食貴旣噴有煩言不能不將售價減輕以便民食而通銷路上年認商接手時每觔計售十九文曾將各局存鹽一律銷竣本年四月閒據黎守稟請仍照此價出售維時因

已增價二十三文又欲免完楊莊半釐故未批准然本
爵部堂未嘗不以加價病民一再躊躇也爲今之計半
釐須解漕徐月餉不能飭裁祇得將外辦雜款酌加裁
減查公款內每引收經費四錢係歸外銷應准免繳該
認商前呈成本清單內如洪湖救生船老子山廟緣兩
款可以全裁又戴參將礮船經費已改歸票販呈繳每
年可省二千五百串將來四岸認商如力不能支尙須
藉眾販之力共固藩籬本爵部堂早籌及之如果各項
酌減之後核之售價尙屬不敷應令票販於四岸之鹽
略減售價務使居民便於買食認商有利可圖鹽有銷

路自然餉有來源也九月海分司項晉蕃稟稱據票販
鴻慶等稟以岸銷每年二萬引前次議減售價每包減
讓一錢奉飭另議實屬力有不逮而欲維大局亦覺勢
不容辭再四籌商擬再減讓三分每包共減定價一錢
三分並蒙大憲批定減繳經費一錢每包共有二錢三
分並據岸商鄧應舉等開具核減成本清摺呈送前來
復經飭傳該商販等面詢情形再三酌議查岸商買運
票鹽原定每包鹽價一兩二分奉飭將洪湖救生船每
包捐銀五毫又老子山廟緣每包捐銀六毫概行裁除
並准每包減繳經費一錢再由票販每包減讓一錢三

分以上每包共減銀二錢三分一釐一毫計岸商買運票鹽一包實給鹽價銀七錢八分八釐九毫並將運費等項核實刪減每觔計合成本十九文如此分別議裁減價出售嗣後四岸銷路當可漸有起色經鹽政曾國荃批查該四岸成本除前次飭令裁減各項外見經該署分司諭飭各票販每包又減價一錢三分尙屬不分畛域運費等項亦經核實刪減每觔計合成本十九文應卽照此出售以便民食如此分別裁減體恤不爲不至該認商務須趕買壩鹽源源捆運至楊莊分卡前已飭裁此後半釐應歸該分司衙門核收轉解五河卡隨

時具報並將該四岸運售鹽數按旬開摺送查

謹按此次海分司附呈減定成本詳見成本卷中

光緒十一年三月海分司項晉蕃稟伏查四岸買運壩鹽已將經費等項裁減在案惟

貢捐一款每引應捐銀七分七釐擬請全裁再將楊莊半釐每包酌減一半計錢一百二十五文又由票販每包減讓售價銀八釐八毫並飭該岸商將局用格外撙節通盤核計每觔可減售價二文淨售錢十七文正在議稟開奉憲批據該岸商請將海流境內阿湖榮莊湖等處應解功鹽飭繳四岸免完稅課每年予以二千引限

制少資津貼等情飭議稟奪伏查功鹽免稅似於政體未協擬飭該商每包繳稅銀一錢共計每引四錢該商既願自行赴運擬由卑衙門編給功鹽護照每引先繳稅銀二錢填註照內其餘二錢俟售鹽時再行繳完至運費一項遠近牽算每引需銀一兩三四錢連稅銀四錢每引成本在二兩三錢上下照每觔十七文出售每引約可餘錢三千零每年卽定以二千引爲准以示限制再該岸商面陳苦困屢求稟退不得不曉以大義令其勉力籌辦一面會營將緝私各事實力講求以期私靖官銷仰副整飭離綱之至意鹽政會國荃批該四岸

應減售價既定每觔減去二文自不能不將成本酌輕
據議裁

貢捐每引七分七釐楊莊半釐每包減一百二十五文再
由票販每包讓價八釐九毫除由岸商將局用自行格
外樽節舍此別無良策應准照辦功鹽稅課不准全免
擬令每包繳銀一錢每年定以二千引爲准於體恤之
中寓有限制所議均妥惟減價須與緝私相輔而行該
四岸近日之滯回由售價較昂亦因巡緝疏懈私梟充
斥占礙官銷所致另單所稟會營將緝私各事實力講
求亦屬至要之策務與田參將等悉心籌畫既減價以

便民食復嚴巡以靖私蹤銷數必當起色旋出示曉諭
邳宿睢桃四食岸從前捆運餘鹽售價甚賤影射出湖
流弊滋大嗣經招商買運西壩完課之鹽又加楊莊之
釐成本增重先經核定每觔售二十三文繼因價昂不
能敵私上年睢邳每觔定售十九文半桃宿每觔定售
十八文半各該居民仍多觀望以致釐課虛懸見據海
分司多方設法酌刪成本再將四岸售價每觔減輕二
文睢邳每觔祇售十七文半桃宿每觔祇售十六文半
核計淮南北岸價無有輕於此四岸者該居民等從前
不買官引尙可藉口於官價之昂今則售價減而又減

足便民食復飭海分司會同田游擊整頓緝私以期岸
務日有起色並通飭各州縣責成醬園鋪戶共赴商店
買食官鹽旣免罹於法網並有益於奏銷本爵部堂於
該四岸居民體恤不爲不至該居民等亦應上願

國課下保身家州縣有督銷緝捕之責尤應傳諭紳董互
相勸勉痛改食私之積習共體保岸之深心俾四岸官
鹽售銷足額本爵部堂實有厚望焉

光緒十一年六月海分司項晉蕃稟據鄧應舉等稟稱商
等所認四岸虧累太深歷蒙各憲體恤減公費裁半釐
運功鹽嚴緝私一再輕減無微不至商等自問已屬無

恩可邀近來數月常不開稱四岸五局每月開支千餘串薪工火食無錢開支斷炊乏用不成局面非特銷滯爲然卽使暢銷每包僅餘局費六十六文以二萬引計之僅得毛利五千餘串而四岸局費減之又減每月斷非千串不可況銷數萬無把握虧更無底商等稟定試辦一年見已逾期無論有無後商接手何日銷竣卽於何日閉歇卽治以罪商亦甘願等情除批飭仍應暫爲支持不得遽行閉歇外惟有轉詳乞示鹽政曾國荃批據詳該四岸銷滯本虧自係實情惟自減售十七文以後宿遷一局及睢甯之高作鎮旣共銷一千餘包是減

價已略有微效此外桃源邳州何以銷數尙無起色前
飭該四州縣於奉文一月後將四邑銷鹽情形稟覆察
核至今未據一縣有稟殊不可解候卽札催又從前四
岸之暢皆言張道富年署徐州道時幫同海分司認真
緝私之力今徐州淮揚兩道均有告示頒發一體督同
州縣實力籌辦並候再行特飭於接見文武員弁時諄
諄告誡不得視爲公牘具文始終膜視唐參將礮船已
於另稟批准改招步隊歸田游擊節制當不至仍前泄
沓王參將林所帶之勇不甚得力勇數亦不足額並候
批飭許道確查整頓該四岸爲淮北藩籬見在價已減

足惟有嚴緊緝私以至逐漸收效卽嚴諭該商勉力支
持不得藉詞推諉

光緒十一年十二月海分司項晉蕃稟據鄧應舉等稟稱
竊桃宿睚邳四食岸自光緒九年九月接辦以來捆運
壩鹽加報釐金提價出售滯銷已極雖蒙先後整頓設
法保全而商等賠累已有四萬數千兩之多前此二十
三四文之成本奉減賣十九文一觔後此十九文之成
本又奉減賣十七文一觔卽以奉減之價計之淨虧血
本二萬數千串徒奉各官府允許籌償商等亦疊次懇
恤卒之望恩莫及本年五月內資本已盡無力周轉決

意退歇仰體憲意東挪西湊苟延今日尙有貼本七千餘串自正月起至十一月止共銷壩鹽三萬數千包以六十六文官利計之毛利不下二千串每年薪工利息非一萬二千串不可縱商人資本若長江大河之多亦不能填此無量巨壑見查各岸存鹽僅有一萬餘包來春勢必斷銷前奉憲批海屬功鹽二千引作爲四岸津貼本年共收田營功鹽四百數十引其應找一千餘引請海分司照數由壩籌撥商亦照章繳價等情又據該商以虧累太多轉輸不繼各岸需鹽甚急擬請捆運壩鹽三四千包先給半價接濟岸銷前來旋飭票販籌議

每檔定以三千包爲率先給半價其餘半價必俟前檔歸清再運後檔之鹽以免套搭而示限制查西壩歷年功鹽收數多則千餘引即使全數抵撥固難湊二千引況西壩稱收功鹽每百觔有犯充賞銀四錢五分二釐六毫無犯充賞銀三錢九分一毫所有應完稅課經費以及倉穀河費等項均係照數全完核與該岸商所運糶莊湖等處之功鹽每包祇完稅銀一錢大相懸殊卑職未敢擅擬鹽政曾國荃批據詳以後買運壩鹽每檔定以三千引爲率先給半價各票販面允照辦具見畛域不分功鹽不足不妨以壩存功鹽仿照糶莊湖章程

酌量撥貼鹽釐可照淮南食岸之案按季核收此外有無可以調劑之處仰再悉心妥籌詳辦各邑銷路已通祇求商有利獲便可持久切勿令其遽退以致功敗垂成旋據海分司覆詳西壩所獲功鹽連同新關倉收運壩功鹽每年祇有一千二三百引擬請每年定以一千引爲率仿照糶莊湖章程辦理惟該商屢次以局用不敷岸用因查五河以下之鹽向不完釐而四岸居五河之下游旣因加釐於先成本過虧自不得不於無可設法之中爲急切裁釐之計如蒙准將楊莊半中減半釐款一概全免能照額銷足則每年可以少完釐錢六千

串抑或將此項釐款照每引見完五百文再行減半完
納飭令該商竭力維持之處乞示飭遵鹽政曾國荃批
該四岸上年所定成本全賴功鹽二千引以資津貼乃
稟定後祇撥四百餘引以致仍前虧折見據該分司查
明隸莊湖連西壩功鹽一併計算每年祇能貼給一千
引則岸費必不敷用前次票販允以三千包循去環來
亦祇能暫緩而不能輕減自應另行設法補救據稱五
河以下之鹽向不完釐請將楊莊半中半之釐一概全
免自係爲力保岸務起見應准照辦免釐以後該商無
可藉口仰卽飭令添籌貲本多設子店源源運銷以保

藩籬而疏官引至四岸應解漕徐協餉每月二千兩以
後改爲該分司與五河釐卡各半分認批解以昭平允
光緒十二年四月海分司項晉蕃稟據認商鄧應舉等以
各項捐款經費已蒙各憲一概全裁又沐請裁全釐功
鹽定以一千引作爲津貼其所以體恤商艱者無微不至
至何敢再生希冀藉退歇爲無厭之求無如前股分已
虧數萬無資可添通岸存鹽見僅七八千包菜市伊邇
一遇陰雨指日斷銷若不稟求先事運籌有誤民食仰
乞諭飭票販迅速運鹽接濟民食等情復據票販鴻慶
等稟以岸銷諸多竭蹶亦係實在情形販等目擊其艱

何敢膜視公同籌議擬於該商到壩捆運之時每包酌貼見銀二分以該岸額銷引數爲斷一俟該商經理得手岸銷暢旺津貼之費即可隨時而止等情復經飭諭該岸商趕緊運鹽濟銷去後茲據岸商鄧應舉等稟以票販鴻慶等讓價出售共固藩籬尤屬誼重同業商等亦爲感激惟以商本虧盡支持甚難而招商接手暫又無人岸務一日未退則濟銷一日在商祇得暫爲措資卽日運鹽赴岸權顧民食仍請招商接替查四岸成本前經稟請減捐裁釐並又飭據各票販議定每包津貼銀二分無非爲保固藩籬起見旣據該岸商措資運鹽

赴岸濟銷惟有督飭該商等務當添措資本源源買運並應多設子店將岸務大加整頓以期經久而暢官銷經鹽政曾國荃批各票販讓價出售具徵力顧大局仰卽轉飭該岸商迅速買運多設子店源源濟銷不得再事觀望是爲至要

光緒十四年四月宿遷縣知縣盧思誠稟卑境去場竈甚近與皖北湘鄂不同舊商運辦餘鹽每觔不過十四文軍民相安已久今新商改運票鹽自係正辦然每觔加至十八文零民間已嘖嘖煩怨今復欲加至二十三文是較歷年之價增及一倍況卑境鹽店非至五十觔成

票不售向無零銷四鄉小民大半由分盆小販展轉零星買食比之城店鹽價必加三四文若一旦加至二十三文則鄉民轉買每筋加至二十六七文鹽爲萬民日食所必需驟然倍價富民猶可貧民何堪且減價所以敵私今忽倍增姑無論貧民便否竊恐私梟充斥而來必更易釀事小民趨利若鶩官鹽貴則食私必然之事是加價並恐不爲新商利也鹽政曾國荃批查邳宿睢桃四食岸從前辦運餘鹽並不完釐又不歸額流弊滋多每筋祇售十四五文不等賤價侵銷勢有必然名雖銷於四岸實則影射出湖而地方及鹽務衙門因之收

受規費商人仍無利獲爲淮北一大弊政嗣經招有新商鄧應舉等願買西壩完課之鹽且在楊莊收納半釐較之餘鹽成本不啻加倍據五河卡黎守稟定每觔售二十三文係屬酌中核議是以左爵閣前部堂批准飭令該縣等示諭在案茲據具稟前情小民惡貴貪賤原屬人情之常但鹽非糧食可比每人一日能食幾何貧民小戶更不比富家需用之多每觔售賣二十三文較之五河以上各岸售價尙平何至貽萬民無窮之累措詞已屬失當且以私梟釀事危言聳聽尤屬非是本爵署部堂辦理鹽務便民恤商二者不能偏廢如果商人

所加之價專爲謀利起見自當立予刪除今詳閱案卷
加價係因承買完課壩鹽又增完半釐成本增重民間
所出之錢係輸之國非入諸商其所收半釐又須抵解
清淮徐臺之餉勢不能裁則與其運餘鹽而難贖官吏
之慾何如運正鹽而略使課餉稍充且該四岸售價稍
昂額鹽少一分侵灌卽多一分銷路於奏銷更屬有益
仰卽照錄左爵閣前部堂及本爵署部堂兩次批示出
示曉諭一面飭傳公正紳士反覆勸導毋再造言阻撓
致干重咎

光緒十五年三月認商鄧應舉等稟去年天旱歲歉銷數

又減虧累更鉅當此商困情急羅掘殆盡欲支而周轉無力勢必斷銷欲退而接手無人遽難脫卸通盤打算殊難久支伏查光緒十二年春曾蒙海分司稟沐憲恩批飭票販半價運鹽三千包作爲循環滾欠行之已久刻下存鹽甚少春銷菜市需鹽甚迫一經斷銷私梟卽乘閒而入難保不充斥綱引地界擬乞飭票販將前案半價之鹽停止另行借給壩鹽六千包權濟岸銷循環滾欠以後歸還前檔之價再撥後檔之鹽總不得逾六千包之限在票販不過初次借鹽稍遲得價嗣後按三千包一批付給見銀毫無套搭此卽通綱票販暫緩雜

課錢糧之意經鹽政曾國荃批該四岸爲淮北藩籬節
經設法補救上年仍因歲歉短銷致增虧累據請將票
販前付半價之鹽停止另行借給塌鹽六千包權濟岸
銷以後循環滾欠仍不得逾六千包以示限制自係爲
力保全局起見候飭海分司傳諭票販遵照該販等誼
切同袍必能互相體諒協力維持也四月海分司項晉
蕃申據該販鴻慶有容等稟稱伏查四岸認商自買塌
鹽以來販等已讓價三次每批捆鹽遵飭先收半釐原
因藩籬所關不得不共相維繫嗣於光緒十二年春開
該商力難支持一再稟蒙憲諭飭議販等籌商於減價

之外每包再給津貼銀二分以額爲率不計己之盈虧但求彼能支持兩年以來辦理尙屬得手上年歲歉銷滯見經該商又以積困虧累稟蒙督鹽憲批准飭令借壩鹽六千包暫濟岸銷販等仰體大憲軫念商艱之至意亦何敢不遵惟是近年票鹽壩銷雖尙如常費用日增成本日重幾於有加無已以致利息侵削殆盡販力亦復奇絀同有岌岌難支之勢四岸固屬北離門戶誠宜共顧然併計數年所讓該商價銀已不下二萬餘金相待情誼自維亦屬盡分茲奉諭飭復又公同集議以大憲之恩膏勸諭之誼切販等雖力有不逮不得不勉

遵憲飭借給壩鹽六千包權濟岸銷所有該商前欠三千包半價庫平銀一千二百四十八兩六錢三分卽照所稟先行清繳嗣後捆鹽以六千包分爲兩批循環遞欠不得逾限此次遵諭借給壩鹽係通壩各販按引攤湊顆粒均關課本俟每綱票鹽售竣截數之際各販亦須清理一綱帳目未便宕欠不結應懇諭令岸商屆時無論該岸捆鹽與否卽將前項三千包欠價全數呈繳憲臺衙門飭發各販收領歸本俟開售新鹽再行借給復欠不得稍有套搭以清綱分等情卑職伏查桃宿睢邳四岸爲淮北全綱引岸藩籬該商鄧應舉自接辦以

來銷滯本虧屢求退歇各票販始則讓價繼議津貼無
非爲共維大局起見此次又據該岸商稟奉憲批准飭
令票販借給壩鹽六千包以濟岸銷亦係不得已之舉
茲據該票販等遵飭如數借給並據稟請飭令該岸商
將前欠三千包半價先行繳清嗣後捆鹽以六千包爲
准循環遞欠每綱票鹽售竣卽將所欠六千包鹽價全
數呈繳俟開售下綱新鹽再行接借等情自係爲截清
綱分以免套搭起見當經諭飭鄧應舉遵照辦理旋據
岸商鄧應舉稟稱前案所欠票販半價之鹽三千包商
卽遵諭措交半價庫平申漕平銀一千二百七十三兩

六錢截清綱分毫無含混懇卽飭發領取以清前欠併
懇迅諭票販卽日撥借票鹽六千包仍請註銷前欠半
價併請轉報督運憲查考等情經鹽政曾國荃批允

兩淮鹽法志卷八十九